

**■ COLUMNA**

# Ecopop – ed autras iniziativas extremas

DA JOST FALETT

Nus avain ditg na a Ecopop – per fortuna. Schizunt uschia clar, ch'ins pudess crair ch'il problem saja schlià per adina. Jau dubit.

Is iniziants da Ecopop han fatg tema cun la creschientscha. Dapi decennis han ils ecologs – ed era jau – chatschà en il chau che la Svizra na creschia betg. La populaziun ha chapì quai. Ed ella ha era chapì che ulteriura creschientscha n'augmenta betg nossa qualitad da viver. Ils dischavantags tras la perdita da terren, tras il traffic sin via creschent, tras il midament dal clima ed auter vegn adina pli grond. Tuttina na passa betg in di che politikers ed economia na pretendan betg che nus dovriam creschientscha. Els na differenzieschan dentant betg tgenina: creschientscha quantitativa (dapli: dapli energia, dapli traffic sin via ed en l'aria, dapli letgs, ...) u creschientscha qualitativa (far meglier: dapli energia regenerabla, dapli traffic public, dapli letgs per il turissem en l'hotellaria, ...). La politica ha qua en maun da diriger quest svilup, da prender las temas e persvader il pievel: pertutgant l'energia actualmain en il Cussegl nazional. Sche la politica na reagescha dentant betg, crescha il malesser, il pievel fa il pugn en gaglioffa e di



gea ad iniziativas extremas – sco reacziun sin ina situaziun extrema.

Quai è succedì tar l'iniziativa da Weber per limitar las abitaziuns secundaras sin 20%. Extrem, senza dubi, ma vischnancas cun quasi 80% abitaziuns secundaras – ed in hotel suenter l'auter che serra e producescha anc dapli letgs fraids – quai è era extrem. Ins avess savì evitar quai: Avant onns ha il Cussegl grond sbittà ferventamain la proposta da limitar las abitaziuns secundaras en l'entir chantun sin 50%. Ed era tar la revisiun da la lescha da planisaziun federala avess'ins savì limitar las abitaziuns secundaras sin in nivel raschunaivel. Ussa avain nus ina lescha che vala per tut la Svizra e limite-scha era il svilup che fess da basegn p.ex. en Surselva ed en la Val Müstair. I na gida betg da planscher che la Svizra Bassa haja majorisà las regiuns da muntogna. Nus avessan gi en maun da reagir pli baud –

ed era tar nus han var 40% votà gea. Era qua sa il parlament federal mussar actualmain cun la lescha da las abitaziuns secundaras ch'el prenda serius la malcontentientscha da la populaziun.

Il medem è succedì tar l'iniziativa da l'immigraziun da massa. La Svizra ha la pli gronda immigraziun per chau da la populaziun da l'entira OECD. E firmas senza responsablad sociala e politica san engaschar lavurers bunmartgads da l'ester e cunfinaris entagl da indigens. Quai é ina politica privlusa: Il pievel che ha avunda vul dar in signal cun il cedel da votar – e periclitescha elements centrals da nossa economia, sco p.ex. las bilateralas.

Ussa avain nus ils resultats ed avain da realisar quels cun tutta consequenza – tant per las abitaziuns secundaras sco per l'immigraziun. Ina realisaziun be parziala promovava nov malesser ed alimentescha danovmain partidas populisticas che vivan da la tema da la populaziun. Tant quellas partidas sco era la populaziun ston ussa vesair las consequenzas da lur decisiuns – e sche quellas èn stadas faussas stuain nus curreger ellas cun ina nova votaziun. Prender serius il pievel è la basa fundamentala da la democrazia.